

Bulan ini kita akan membincangkan tentang jenis – jenis Insurans Hayat yang terdapat di pasaran. Ini akan membolehkan anda membuat penilaian tentang pelan yang berbeza supaya pilihan anda menepati keperluan anda.

**S**eperti kata pepatah, 'penawar bagi seseorang adalah racun bagi orang lain.' Jadi, jarang terdapat satu penyelesaian yang sesuai untuk semua keadaan kewangan anda masing-masing. Anda perlu tahu pelan apakah yang ada di pasaran dan yang mana sesuai untuk kemampuan anda.

#### Apakah jenis pelan Insurans Hayat yang ada di pasaran?

Pada dasarnya, terdapat dua jenis pelan Insurans Hayat dalam pasaran hari ini – satu dikenali sebagai Insurans Hayat Tradisional dan satu lagi ialah Insurans Berkaitan Pelaburan.

#### Apakah jenis pelan Insurans Hayat Tradisional?

Di bawah pelan Insurans Hayat Tradisional, pada umumnya terdapat

tiga jenis insurans yang utama, iaitu Bertempoh, Seumur Hidup dan Endowmen.

Insurans Bertempoh ialah jenis insurans hayat yang paling mudah. Ia membayar manfaat sekali gus apabila berlaku kematian atau hilang upaya menyeluruh dan kekal dalam tempoh polisi, yang boleh meliputi tempoh daripada satu hingga 30 tahun atau sehingga umur tertentu, biasanya sehingga umur 70 tahun.

Bagi Insurans Seumur Hidup pula, seperti namanya, tempoh perlindungan ialah untuk sepanjang hayat anda. Ia juga membayar manfaat sekali gus apabila berlaku kematian atau hilang upaya menyeluruh dan kekal dalam tempoh polisi, yang boleh menjangkau sehingga umur 100 tahun atau lebih. Apabila polisi ini matang, anda pasti akan dibayar jumlah diinsuranskan serta nilai tunai, jika ada.

Pelan Endowmen ialah pelan insurans yang mempunyai tempoh matang tertentu, misalnya 15, 20 atau 25 tahun. Pada akhir setiap tempoh matang ini, anda dijamin mendapat bayaran amaun Jumlah Diinsuranskan. Di samping itu, jika pelan anda adalah polisi sertaan, anda juga boleh mengharap untuk menerima bonus sepanjang tempoh polisi anda tetapi amaunnya tidak dijamin. Apabila

Artikel ini disumbangkan oleh Persatuan Insurans Hayat Malaysia (LIAM). Untuk keterangan lanjut, sila layari laman web: [www.liam.org.my](http://www.liam.org.my) atau e-mel ke [liaminfo@liam.org.my](mailto:liaminfo@liam.org.my).



Persatuan Insurans Hayat Malaysia  
Life Insurance Association of Malaysia

berlaku kematian atau hilang upaya menyeluruh dan kekal, ahli keluarga anda juga pasti dibayar amaun Jumlah Diinsuranskan serta bonus yang diisytiharkan, jika ada.

#### Apa itu pelan Insurans Berkaitan Pelaburan?

Pelan Insurans Berkaitan Pelaburan merupakan insurans hayat yang menggabungkan pelaburan dan perlindungan, di mana premium anda yang diagihkan itu diunitkan, iaitu bergantung pada pilihan dana anda, premium anda akan dibahagikan kepada unit-unit yang sama nilainya. Harga unit-unit ini disiarkan setiap hari dalam surat khabar untuk anda mengikuti perkembangan nilai pelaburan anda.

Oleh itu, premium anda bukan sahaja menyediakan perlindungan insurans hayat, malah sebahagiannya juga akan dilaburkan ke dalam dana tertentu pilihan anda. Anda boleh memilih bagaimana hendak mengagihkan premium insurans anda untuk perlindungan dan pelaburan. Lazimnya, terdapat dua jenis pelan Berkaitan Pelaburan – pelan Premium Tunggal dan pelan Premium Berkala. Kami akan membicarakan jenis-jenis pelan ini dengan terperinci dalam artikel kami yang akan datang.

# Pelan Berbeza Untuk Keperluan Berbeza

## Jadi, pelan manakah yang terbaik untuk saya?

SEPERTI yang dinyatakan sebelum ini, sebenarnya tiada satu pelan yang terbaik kerana ia amat berkait dengan kemampuan serta keperluan dan keadaan anda yang berbeza. Jika anda lebih suka kepada lebih kepastian, maka anda mungkin mahu membeli pelan Insurans Hayat Tradisional.

Tetapi jika anda sanggup mengambil risiko yang lebih sedikit maka pelan Insurans Berkaitan Pelaburan mungkin lebih sesuai untuk anda. Pilihan terbaik mungkin ialah memiliki gabungan kedua-dua jenis pelan, dengan pelan Seumur Hidup tradisional berfungsi sebagai asas anda dan pelan Berkaitan Pelaburan pula memberi anda rangsangan tambahan dalam perlindungan anda dengan premium yang sangat berpatutan.

Itulah dia pelbagai pelan Insurans Hayat yang terdapat di pasaran untuk memenuhi keperluan dan keadaan yang berbeza. Dalam hal ini, memang tepatlah seperti kata peribahasa, "lain padang lain belalang", lain orang lain kehendaknya!

Bulan depan kami akan membincangkan pula tentang Pelan Berkaitan Pelaburan dengan lebih mendalam. Jika anda tertanya-tanya sama ada ia pelan insurans atau pelan pelaburan, semuanya akan terjawab pada bulan depan!